

Date – 24/10/2024

Time - 18:30 Hrs

1. UD&PA Minister Pu K. Sapdanga chuan sorkarin a kalpui mek Bana Kaih hmanga kaihchhuah theih tur chuan mipuiten an ban an phar a, an penchhuah ve a ngai a ti.
2. YMA Rorel Inkhawm Aizawl-a neih chuan Ruihhlo Do kawngah YMA in tun aia chak zawka hma lak ni se an ti.
3. Union Cabinet chuan Space Sector atan Venture Capital Fund hnuaiiah cheng vaibelchhe 1000 hman a remti.
4. Union Cabinet Committee on Economic Affairs (CCEA) chuan rel project pahnih cheng vaibelchhe 6,798 senna tur a pawm.

<><><>

DAY NULM

UD&PA Minister Pu K. Sapdanga chuan sorkarin a kalpui mek Bana Kaih hmanga kaihchhuah theih tur chuan mipuiten an ban an phar a, an penchhuah ve a ngai a ti.

Wawiina Aijal Club Park, Aizawla Deendayal Antyodaya Yojana - National Urban Livelihood Mission (DAY-NULM) hnuaiia Aizawl City Mission Management Unit (CMMU) buatsaih, ni 3 chhung awh tur DAY-NULM Festival-cum-Street Food Festival a hawnaah Minister chuan he thu hi a sawi a. Minister chuan UD&PA department hna pawimawh ber te zinga mi chu DAY-NULM a nih thu a sawi. Hemi hnuaiiah hian hmasawna ruhrel din ni lo, mihring tak tak te va chawikanna a nih avangin a pawimawhin a tuiawm hle a ni a ti.

Minister chuan an department hnathawkten mi tam tak eizawna an siam saka hna tha tak an thawh chu a tawk mai lo a, inzarpharhna mipui tam lehzualin an hnathawh te an lo hriat a, an lo hlawkpui theih tura puandarh hna thawh uar a ngai a ni a ti a. Puanzar hna, publicity atana inren lo turin department hotute a fuih bawk a ni.

DAY-NULM Festival-cum-Street Food Festival hawna inkhawm hi UD&PA Secretary Pu Lalmalsawma Pachuau in kaihruaiin DAY-NULM State Mission Director Dr. Andrew H. Vanlaldika chuan kaphung leh he mission hnuaiia hmalakna hrang hrang leh hmachhawp te a sawi a.

Festival chu DAY-NULM hnuaiia hamthatna dawngtute tana buatsaih niin district hrang hrangah neih thin a ni a, tun tum hi a wawi 3-na niin district dangah chuan kumtir lamah an nei a. Wawiin Festival-ah hian hamthatna dawngtu mi 47 te telin heng mi te buaipui hian stall 19 hawn a ni. Wawiin Festival-a tel pakhat, Aizawl Tuikual South-a khawsa Lallawmpuii chuan DAY-NULM hnuaiiah puanthui a training thu sawiin thiamthil pe tu UD&PA hnuaiia DAY NULM chungah lawmthu a sawi.

<><><>

CESJ

Centre for Environment & Social Justice (CESJ) chuan sorkar department pali (4) a changtu Minister theuhte hnenah Mizoram tualchhuak thil hrang hrang humhalhna dan kengkawh tha turin an ngen. CESJ hian Mizoram pawn atanga belpuia sangha chi/no kawta Mizoram hmun hrang hrang atanga zuar kual thinte titawp turin, Fisheries minister ngenin an ngen chhan chu tualchhung sangha ei zo a an chim ral nasat vang a nih thu an sawi a. AH&Vety Minister hnenah Ministry of Animal Husbandry and Dairying-in ui thenkhat, mihring seh ching leh mihring leh vantlang tana hlauhawm thei, India rama ui lakluh khapte chu Mizorama lakluh khap ve turin an ngen bawk a ni.

CESJ chuan Environment, Forest & Climate Change Minister hnenah ram dang thing, hnim, thlai leh pangpar, tualto tan a pawm em tih zirchiang hmasa loa lakluh khuahkhirh turinan ngen a. Horticulture Minister hnenah ram pawn atanga thlai leh thei lakluh leh ram chhunga thar chhuah te a thlai vawn thatna leh hlo tûr hmanin Mizo mipui te hriselna a nghawng theih avangin zirchianga khap turin an ngen bawk a. CESJ chuan Minister te hmalakna an ngaihven zui zel dawn thu an sawi bawk a ni.

<><><>

YMA ROREL

Wawiina YMA Rorel Inkhawm Vawi 4-na, R. Dengthuama Hall, Aizawl-a neih chuan Ruihhlo Do kawngah YMA in tun aia chak zawka hma lak ni se tiin an rel.

YMA President Pu Lalhmachhuana kaihhruai YMA Rorel Inkhawmah hian palai mi 1164 an kal a, Rorel Inkhawmah hian YMA khawih agenda 8 leh sorkar khawih agenda 4 an pass a ni. Kan corr report lo ngaithla ang.

YMA Rorel Inkhawmah hian Central YMA Asst. Secretary Pu Fabian Lalfakawma chuan Hruaitu hlun chawimawina a sem a. General Secretary Prof. Malsawmliana'n ram ngaw leh nungcha humhalh tha lawmman, tuihna humhalh tha lawmman, Luidung humhalh tha lawmman, Kumpuan bawhzui tha lawmman, Chanchinbu tha lawmman leh YMA chanchinbu la tha lawmman a sem bawk a ni.

Central YMA Treasurer Pu Roneihthanga'n kum 2024-2025 Central YMA Budget atana cheng nuai 203, sing 3 sang 1, 980 a pharh chu Rorel Inkhawmah hian pawm a ni bawk.

<><><>

MAMIT SERICULTURE

Mamit District Sericulture Office, Mamit chuan nizan khan Govt. Muga Seed Farm, Hmar Veng, Mamit-ah Muga Silkworm Pangang 'Favang Seed Crop (Bhodia)' an khawi mek chu pangang cocoon tur an sengkhawm.

He hunah hian District Sericulture Officer (DSO), Pu Lalbiakhlua Ralte leh Sericulture Extension Officer Pu Lalramchuana bakah technical staff dangte'n pangang khawi dan leh a kal hmangte hrilhfhahna hun an hmang a, kuthnathawktute hnena hlan a nih dan leh pangang seng khawmna atan hma an lak dan sawi a nih bakah Pu Lalbiakhlua Ralte chuan tha zawk leh changtlung zawk a seng khawmna hun la buatsaih zel an tum thu a sawi bawk.

He hunah hian Muga silkworm seng khawm a nih mai bakah Mutih Pangngang (Eri) khawi mekte pawh enho a ni a. Heng Muga silk pangang khawi hun chhung hi ni 30-40 a ni a, tunah hian a chi gram 88 thar chhuah an inbeisei a, heng a chi te hi pangang khawitute hnenah sem leh tura ruahman a ni.

Tun dinhmunah Mamit District ah hian project kallai mek hnuaiah muga silk pangang khawi chhungkaw 49 an awm mek a, hemi bakah hian project kallai piah lamah mahnia khawi chhungkaw 67 an awm bawk a ni. Pangang khawituten an thar chhuah Cocoon hi department in kg khat cheng 500 zelin an lei sak thin a ni.

<><><>

SEMINAR ON JAMES DOKHUMA'S WORKS

Ni hnih awh tur James Dokhuma kutchhuak zirhona Aizawl Govt. Hrangbana College ah wawiin khan buatsaih a ni.

Govt. Hrangbana College-a Mizo Department leh Mizo Language Development Board tang kawpin an buatsaih James Dokhuma kut chhuak thawnthute zir hona hawngtu Mizo Language Development Board Chairman Pu R. Lallianzuala chuan James Dokhuma thawnthu ziah thiamzia te, a thawnthu ziahte hmanga Mizo Culture a lo vawn nun thatzia te sawiin, lehkha zir sang lo tak ni chung a ren tin daih lehkhabu ziake thei a nih si dan te bakah, a lehkhabu ziah hlu tak takte hmanga Mizo tawng ti hausatu leh tihmasawntu a nih avanga Mizo zinga Bhasha Samaan dawng hmasa ber a nih dan te a sawi.

Language and Literature huangah Mizo Zinga Padma Shree dawng hmasa ber a nih thu a sawi bawk a ni. He hunah hian Pu R Lalrawna, Pu B. Lalthangliana leh mi hrang hrangin a chanchin an sawi bawk a ni.

Chawhnu lamah a thu leh hla zir chianna hun hman chhunzawn a ni a, College leh University-a zirtirtute leh Research Scholar-te bakah mi thiam hrang hrangin James Dokhuma thawnthu kawng hrang hranga an zir chianna paper an chhiar a ni.

Ni hnih awh National Seminar-ah hian thupui hrang hrang sawm leh pariat sawi ho tura chhawp chhuah a ni a, heng thupui hrang hrang hmanga thuziakte hi lehkhabu tih chhuah tum a ni.

<><><>

UNION CABINET

Union Cabinet chaun Space Sector atan Venture Capital Fund hnuaiah cheng vaibelchhe 1000 hman a remti. Kum nga chhungin Venture Capital Fund hnuaiah hian hman tur niin kumkhatang cheng vaibelchhe 150 atanga 250 hman tur a ni a. India Space Sector tihchangkawng tura hmalak bakah ngaihtuahna thar hmang uara ram eibar hmasawna tura kalpui a ni ang.

<><><>

UNION CABINET ON RAIL PROJECT

Union Cabinet Committee on Economic Affairs (CCEA) chuan rel project pahnih cheng vaibelchhe 6,798 senna tur a pawm. He project hi inkalpawhna tha siam, zin veivah awlsamna leh bungraw phurhkualna man tihhniam kawngah a thawhhlawk dawn hle a. Project pakhat zawk hi railway line thua hnih Narkatiaganj atanga Raxaul, Sitamarhi leh Darbhanga bakah Sitamarhi-Muzaffarpur section-a tlan tur a ni a. A sei zawng hi km 256 a thui tur niin Nepal, India Hmarchhak leh ramri hmuna awmte tan bungraw phurhkual leh eibar zawna kawngah a tangkai dawn a ni.

Hei bakah hian Union Cabinet chuan Errupalem leh Namburu inkar km 57 a thui rel kawng siamna tur a pawm baw a. He rel kawng hian Andhra Pradesh-a Vijayawada leh Guntur district leh Telangana-a Khammam district a paltlang dawn a ni.

<><><>

GERMAN CHANCELLOR

German Chancellor Olaf Scholz chuan ni thum cham turin vawiin khan India a lo thleng a. Intergovernmental Consultation wawi 7-naah a tel ang. He consultation hi Prime Minister Narendra Modia leh Chancellor Scholz ten an kaihruai dawn a. Hruaitu pahnihte hian ralthuam lama thawhdunna leh eibar zawna lamte an sawi dun dawn baw a. Asia Pacific Conference of German Business ah thu an sawi dawn baw a ni.

<><><>